



山西通志卷第一百九十九

山西巡撫都察院右副都御史臣覺羅石麟奉

旨修輯

藝文十八 碑碣九

明

楊襄毅公神道碑

許國

昔我世宗肅皇帝神聖睿明旁燭獨斷選任羣吏各稱其器  
能讒言遊辭罔間罔貳策役指使動有成功用克內奠方夏  
外攘四裔功德之隆上配二祖垂譽無極而其時出入將相  
文經武緯天下倚以爲安者則少師兼太子太師吏部尚書  
楊公實爲第一公諱博字惟約別號虞坂山西蒲州人也舉  
嘉靖己丑進士知陝之盩屋徙長安徽拜兵部武庫主事遷

郎中故相翟文懿公奉命犒諸邊以公叅幕府當是時宣大卒悍驕屢戕其帥公告文懿以便宜撫諭之鎮賴無事至肅州屬番數百人遮道要賞文懿欲弗予不能欲予患來者滋衆無以應公請文懿坐堂數以命使至不悉衆遠迎將縛以屬吏番人叩頭再三請乃釋不罪而稍賚其首至者諸番感且畏竟不敢復來文懿還朝首以公薦賜白金文綺改職方郎中公之從文懿起遼左迄甘肅行萬餘里具得山川險易士馬强弱怯勇民所欲惡之大端及在職方虜數入宣大山西督撫奏報一夕十數上公懸度立斷悉中機宜時出奇畫衆謂未必然已而無不然肅皇將有討於安南公請先以文告及乞降請許以自新因疏便宜六事肅皇盡用其策益知公自山東提學副使山東糧儲叅政不四年起拜命都御史

巡撫甘肅罕東諸屬番以辟土魯番居肅州境上其後族類日盛強西人以爲憂而力莫能遣公召語之曰若屬羈於此謂暫可安耳非所以計久遠也自白城至金塢水甘而草肥吾爲若築城堡作渠壩給耕具俾往居之何如咸頓首曰幸甚公遂築城七計地與人置食用之器咸備以示諸番諸番謹呼遂出塞遠者至百五十里鑿龍首等渠墾田三萬餘畝召民耕其中又請以巡按御史督學政西人由是富而知學虜嘗大入士競爲公死戰斬首百四十餘級賜詔嘉獎晉右副都御史丁母憂西人遮道泣留窮荒孤戍至今以爲尸祝仇鸞之未敗也公與總督曾襄愍公論之徵下詔獄而時襄愍方議逐套虜城東勝及故受降三城期並河以爲塞鸞與黨詆爲生事卒殺襄愍庚戌敵入薊薄都城鸞以勤王有寵

數毀公肅皇知其情竟不爲害壬子鸞殛死公亦服除明年  
詔卽其家拜兵部侍郎兼僉都御史經畧薊保二鎮庚戌之  
變敵實道潮河川入議者爭請爲備而水湍悍不可城公緣  
水築墩離立錯峙墩置戍守矢石相及敵衆不復敢掉臂行  
其間秋召還提督京城九門故事歲七月輒分兵守陴如寇  
至公曰此自疲術也亟罷歸其營兵不勞而費省冬詔公督  
薊遼保定軍務選士馬繕堡堞除戎器爲不可攻以待攻無  
何敵犯古北口號二十萬連營百餘里公身被甲督諸軍禦  
之敵屢攻不得入則併力攻孤山堡夜攀堞登我軍斫其腕  
墮敵氣大沮肅皇馳賜公緋矛衣出帑金萬犒士公宣布德  
威諸軍益感奮殺傷敵無算已又募死士持火器夜警其營  
竟夕四五發敵衆自相蹂躪死比明悉遁去論功晉右都御

史兼侍郎應一子錦衣千戶明年敵萬騎入馬蘭峪擊却之  
幾獲其長悉遁去召拜兵部尚書尋加太子少保黜陟將吏  
人莫敢干以私丁父憂戊午召還本部公方疏辭會敵圍太  
同右衛急召公往據公乃墨綬出關敵聞曰楊太師至矣遽  
解圍去先是右衛被圍久其將士固守無二以公疏請褒卹  
條戰守及善後十事奏行之又築牛心等堡寨墩臺二千八  
百七十二座濬大濠二長各三十里小濠六十四交互聯絡  
敵左右顧不得騁而南晉太子太保兼左副都御史敵首哱  
素時以輕騎擾邊計擒之斬其黨十五人分兵襲擊斬獲又  
若干人未幾敵入薊州召公移鎮公畫地爲十區檄諸將分  
區拒守而三耀武于邊諸部震悚終歲無敢近塞者召還掌  
部事加少保權倖不便公所爲往往爲飛語中以奇禍肅皇

悉拒不納更下諭褒美諸邊奏捷賜本兵金帛有加一品考績賜羊酒授勲柱國又以勲其先於是讒忌始息癸亥秋敵且犯薊前鋒陽指遼督臣信之身走遼以禦公策敵詐檄止其行不得手爲書三止之又不得乃嚴備京師而檄諸路提兵傳關下後數十日敵果從牆子領犯通州烽火徹御宮諸邊兵望見馳入據一日夜雲集敵驚爲神乃解去乙丑以一品再考廕一子國子生吏部尚書缺廷臣首推公肅皇難其代留疏一日念非公不足任竟改吏部未幾肅皇崩穆宗莊皇帝奉遺詔錄忠諫舉遺佚公皆贊成之平宸濠功復新建伯文成王公爵召諸舊德布在臺省郡邑長吏有聲績增秩示勞不輕徙官一時所稱善政多出公請丁卯一品三考晉少傅兼太子太傅再廕子國子生己巳論事忤旨會左右倖

臣多毀公者謝病歸辛未莊皇悟詔起公以冢宰行兵部事  
今上嗣統邊警益稀詔公還吏部以一品四考晉少師兼太  
子太師仍廕子國子生賜資甚厚癸酉分獻文月壇疾暴作  
扶歸上疏乞致仕上不允加賜餼牢酒米公又疏辭謂有不  
忍言去之狀三不得不去之情三上乃許賜乘傳命子俊民  
俊卿侍行至蒲數月卒上聞震悼輟視朝一日賜祭葬贈太  
傅謚襄毅廕一子中書舍人公性明達事無小大一見輒能  
得其微與其終所當成敗言於士大夫下至厮卒無隱情談  
說古今品第人物數暢該博聽者忘倦涖官涖戎應酬庶務  
雖甚繁劇意常安閑夙興候朝夜分計政不少倦怠亦無勞  
苦之色秉旄仗鉞鳴玉曳裾融融叩叩人望而畏蓋其稟厚  
養完非偶然也所著虞坂文集詩集雜著歷官奏議凡八十



四卷生正德己巳五月二十四日卒萬歷甲戌八月二十三日壽六十六公之先出宏農華陰國初有諱善甫者始徙蒲州曾祖諱祖選考四川按察僉事瞻皆以公貴贈如其官曾祖妣張祖妣趙妣田皆贈一品夫人配段累封一品夫人子男五俊民嘉靖壬戌進士太僕少卿俊士萬歷甲戌進士鳳陽府推官俊彥官生俊卿隆慶戊辰武舉第一人管錦衣衛事指揮使俱段夫人出俊臣官生側室賀出女四長適州學生景宣次適舉人馮淪次適嵩縣守備孫仲金夫人出又次未字側室何出孫男八女十四太僕兄弟以歲乙亥十二月二十日葬公王莊之原書謂予曰先公有碑在神道願爲銘予始官翰林則識公其後濫竽內閣與公同知肅皇數奉諭司其事及朝之大政大疑言合志乎旣各自爲知已而孤危

之迹每互爲保持賴肅皇察知無他獲有終始公數謂子曰  
博之稍有建立肅皇恩也當宮車晏駕山陵揜土予與公相  
對撫膺而號者歷五六而益悲故銘公勲業悉論次肅皇之  
知而能任者大書刻焉蓋公志也銘曰君臣之際古難其逢  
或旣逢矣而鮮克終於維肅皇協德二祖挈持儀璘照茲下  
土賞必有功用必當才恭已穆清坐制九垓公於其時奮自  
郎吏奇畫計謀動與帝契重瞳屢矚曰宜佐予出總方鎮入  
秉戎樞先事而言中如龜卜信口發論萬邦讐服據桴未鼓  
瓊裘喙奔荒域載戢鯨波晏澄帝曰武功已就厥緒尚敕掌  
銓匡我文治乃位冢宰董正百官貴權佞諂避莫敢干吏職  
且修民用寧一暨于嗣聖亦賴其績躋而復起德音彌昭士  
望民譽冠於三朝惟公之生功在宗社厥初未貴誰識知者

山西通志 卷一百九十一  
赫赫肅皇識公於微豈無謗傷帝意不移同德同心廿年一  
日式闡厥猷勲崇名立湯與尹舉宣作召庸凡公所就孰非  
天功我銘公碑稽首頌帝明哉良哉欽於世世

重創先儒文中子廟碑

俞汝爲

隋大儒王先生通字仲淹沁之銅川人漢徵君霸之後也世  
稱龍門人按漢書霸居廣武七世而遷六子書仲淹自謂曰  
吾家銅川六世矣讀書山中遺址尚在州人祀之鄉賢父隆  
爲隋國子博士開皇四年生仲淹十歲侍父側憂皇綱不振  
父異之十八年父燕居歌伐木而召仲淹告以在三之義仲  
淹於是有志四方就族父仲華學易河東關子明學禮會稽  
夏璵學詩東海李育受書北平霍汲正樂不解衣帶者六年  
而學已大成西遊長安見帝上太平十二策帝不用作歌而

歸再徵之不至乃續詩書正禮樂修元經讚易道門人從遊者以千計房元齡魏徵等皆入室弟子也大業中召署蜀都司戶再徵爲著作郎並不就僕射楊素重之勸之仕不應常謂李勣等曰吾周之後也世習禮樂不遇王者其天平所著有禮論十卷續書二十五卷續詩十卷元經十五卷贊易十卷並未梓行及卒門人謚曰文中子貞觀初弟子收其議論分爲六部號曰王氏六經又取問對之書勒成中說州人於讀書處立祠祀之以房魏諸君子從祀焉唐襄陽皮襲美志之詳矣祠在銅川紫金山余入境以先儒道脉幸有存者欲以身肩之以請兩臺報可屬州貳喬可大叅軍鮑拱經紀其事中祠堂五楹設龕座前後軒楹各三東起茶廳後寢堂各三左右庫房東西庖室各三祠前號房東西各五固以重門

翼以便門繚以崇垣不三月而規制大備中設隋大儒鄉賢  
文中子木主以魏徵房元齡薛收程元李靖李勣杜如晦賈  
瓊陳叔達溫大雅姚義等配享從故典也祀以春秋上丁如  
祀鄉賢儀丹堊旣飾祀事孔明翼如楚如可垂永久士民驩  
然相慶謂數百年曠典不圖修舉自今也房魏事業必有振  
而起者廼記其事於石繫之以銘銘曰於維大道苞鑰自天  
晦明續紀千古已然河洛未兆孰啟其先洙泗旣往孰嗣其  
傳卓哉大儒奮起銅川遭隋之亂韜光自全講道河汾從者  
如泉累徵不起潛心簡編亦有中說爲世真詮羽翼斯文厥  
功偉焉廟貌旣斬二百餘年誰其新之臺省名賢咸有德意  
祇肅用宣廼召匠氏廼植廼甍工無煩費士也告虔有恤其  
宮有楚其邊以起後人振迅而前百世無斁侑此芳筌

詹事府詹事兼翰林院侍讀學士劉公虞夔墓誌

王家屏

萬歷丙申夏六月望日宮詹學士劉公直卿卒於家其弟太學生虞龍至京疏奏上念宮詹講讀勞特敕所司諭祭營葬蔭其子國子生視卿臣禮有加焉余爲之誌曰直卿姓劉氏諱虞夔別號和宇世爲山西高平人家縣北太中里曾大父贊始徙居米三鎮大父韜由鄉舉官學博以彬泉公貴封戶部主事彬泉公諱崇文嘉靖丁未進士仕至淮安太守配張安人歲壬子冬彬泉公監兌江西還止都門外趙醫家宿焉一夕趙夢綦冠紫衣人剝啄於門覺而聞兒啼聲則直卿生矣生周歲病脾垂殆聞鄉先生王一菴精術學往卜之得三傳四課元胎之應曰兒無恙且當早達爲文學貴近臣也旣

髻病良已聰慧勃發日可讀書積寸其於經初治尚書已治周易最後治春秋咸自探討不由師授年十六魁省闈弱冠登辛未進士選讀中秘書詩若文力追古作兩擅其長癸酉授翰林編修明年使秦藩尋充大明會典纂修官教習內書館壬午考九載績轉侍讀是歲分纂起居章奏兼理誥敕踰年充經筵講官丙戌擢左春坊左諭德兼翰林院侍讀掌坊事已簡充日講官兼清武職黃會典成晉左庶子兼侍讀戊子以太常寺少卿兼翰林院侍讀學士掌院事明年晉詹事府詹事兼官經筵日講俱如故忽聞母張安人病亟圖請告歸而安人之訃至一號幾絕已彊起具疏言臣不孝死罪臣母就木而臣不及視含殮也歸何以見臣父惟上哀憐之臣得微恩於母而請罪於父以僇於宗死且不避上特命

詔封彬泉公如直卿官而安人贈淑人子之祭葬服除撫按  
交章奏薦有詔起正史副總裁而忌者撫浮言中之直卿自  
念生平重名檢乃橫罹萋斐意不能無介然然是時彬泉公  
春秋高以得侍左右爲幸無幾彬泉公捐館直卿扶病號踊  
益毀瘠不勝喪竟委頓苦次卒距其生年僅四十有五直卿  
天性故恭謹又自以英齡擢上第驟踐清華宜求不負其職  
益務挹損逡巡有以自下遇詞林先達於朝偃僂却立牽其  
臂乃前與之揖磬折欲盡與之語訥然若不出諸口也朝下  
蹙蹙策馬歸鍵一室攤書盈几搜奇抉隱率夜分始就寢發  
爲文章泉溢盆涌而彌好深湛之思其典制必考義選詞字  
雕句琢無片語不工麗乃已自餘應酬諸作徵求者填戶亦  
必遲之累旬月躊躇滿志而後出之卽一尺蹠非再四點竄



不發也侍上講幄依經演義就事陳規每蘄於感悟嘗說詩夜如何章反覆發明人主憂勤之念上爲動容嘉其稱職庚辰癸未再分校禮闈士鑒別精審直卿雖退然若不勝衣而外飭中凝卓有定執非其義一然諾不肯輕一色笑不肯苟一造謁不肯失足也尤嚴取予官邸資用常仰給家儲諸饋饋常儀概謝弗內內之報必倍人以是盡諒其廉掌詹時儲議未決奮袂起曰茲寧異人任乎趣草疏勸上早定大計不報比廬居議益譁復草一疏馳奏當塗阻之遂不果上草今藏於家曰漆室葵忱云

資德大夫正治上卿太子少保兵部尚書兼都察院左副都御史贈太子太保郅公光先墓志

虜自欵貢保塞稱外藩踰二十年文武重臣擁節旄樹聲威